

PWYLLGOR GWAITH

Cofnodion y cyfarfod a gynhaliwyd ar 18 Gorffennaf, 2016

- PRESENNOL:** Y Cynghorydd J. Arwel Roberts (Is-Gadeirydd) (Yn y Gadair)
- Y Cynghorwyr Richard Dew, Aled Morris Jones, H. Eifion Jones, Kenneth Hughes, Alwyn Rowlands.
- WRTH LAW:** Prif Weithredwr
Prif Weithredwr Cynorthwyol (Llywodraethu a Thrawsnewid Prosesau Busnes)
Prif Weithredwr Cynorthwyol (Partneriaethau, y Gymuned a Gwella Gwasanaeth)
Pennaeth Swyddogaeth (Adnoddau) a'r Swyddog Adran 151
Pennaeth Gwasanaeth (Gwasanaethau Oedolion) (ar gyfer eitem 6)
Pennaeth Gwasanaeth (Gwasanaethau Democrataidd) (ar gyfer eitem 5)
Rheolwr Strategaeth a Datblygu Tai (LR) (ar gyfer eitem 7)
Rheolwr Busnes (Gwasanaethau Tai) (NM) (ar gyfer eitem 7)
Rheolwr Datblygu Economaidd (AD)
Uwch Swyddog Datblygu (Twristiaeth a Marchnata) (MPT)
Rheolwr Hamdden Masnachol (GR)
Swyddog Pwyllgor (ATH)
- YMDDIHEURIADAU:** Y Cynghorydd Ieuan Williams
- HEFYD YN BRESENNOL:** Y Cynghorwyr John Griffith, R. Meirion Jones, Alun Mummery
-

Cyfeiriodd y Cadeirydd gyda thristwch at y profedigaeth a ddaeth i ran Arweinydd y Cyngor a Chadeirydd y Pwyllgor hwn, sef y Cynghorydd Ieuan Williams y bu farw ei fam dros y penwythnos. Anfonodd aelodau'r Pwyllgor Gwaith eu cydymdeimlad at y Cynghorydd Ieuan Williams a'i deulu yn eu profedigaeth. Safodd yr Aelodau a'r Swyddogion a oedd yn bresennol mewn distawrwydd fel arwydd o barch a chydymdeimlad.

1 DATGANIAD O DDIDDRDEB

Ni dderbyniwyd unrhyw ddatganiadau o ddiddordeb.

2. MATERION BRYN A ARDYSTIWYD GAN Y PRIF WEITHREDWR NEU SWYDDOG A BENODWYD GANDDO

Ni chafwyd yr un datganiad o ddiddordeb.

3. COFNODION

Cyflwynwyd cofnodion drafft y cyfarfod blaenorol o'r Pwyllgor hwn a gynhaliwyd ar 20 Mehefin, 2016 i'w cymeradwyo gan y Pwyllgor Gwaith.

Penderfynwyd cadarnhau cofnodion y cyfarfod blaenorol o'r Pwyllgor Gwaith a gynhaliwyd ar 20 Mehefin, 2016 fel rhai cywir.

4. COFNODION I'W MABWYSIADU

Cyflwynwyd, i'w cymeradwyo gan y Pwyllgor Gwaith, gofnodion drafft y Panel Rhiantu Corfforaethol a gynhaliwyd ar 6 Mehefin 2016

Penderfynwyd cymeradwyo, i'w mabwysiadu, gofnodion drafft y cyfarfod o'r Panel Rhiantu Corfforaethol a gynhaliwyd ar 6 Mehefin, 2016.

5. BLAENRAGLEN WAITH Y PWYLLGOR GWAITH

Cyflwynwyd, i'w gymeradwyo gan y Pwyllgor Gwaith, adroddiad y Pennaeth Gwasanaethau Democrataidd a oedd yn ymgorffori Blaenraglen Waith y Pwyllgor Gwaith am y cyfnod o fis Medi, 2016 hyd at Ebrill, 2017

Adroddodd y Pennaeth Gwasanaethau Democrataidd fel a ganlyn -

- Y byddai cyfarfod arbennig o'r Pwyllgor Gwaith yn cael ei gynnal ar 25 Gorffennaf, 2016 i ystyried canlyniad yr ymgynghoriad diweddaraf ar safleoedd i sipsiwn a theithwyr ar Ynys Môn ynghyd ag adroddiad y Gwasanaethau Cymdeithasol ar y Tîm Teuluoedd a'r ddarpariaeth gofal mewn perthynas â hynny.
- Bod eitem 10 (Datganiad Sefyllfa - Llety ar gyfer Gweithiwr Adeiladu Wylfa Newydd) a raglennwyd i'w hystyried ar 19 Medi, 2016 ac eitem 29 gan y Gwasanaethau Cymdeithasol (Aseiad Anghenion Deddf Gwasanaethau Cymdeithasol a Llesiant) a raglennwyd i'w hystyried ar 13 Chwefror, 2017 yn eitemau sy'n newydd i'r Rhaglen Waith.
- Y bydd eitem ynghylch Cronfa'r Degwm a raglennwyd i'w hystyried yn y cyfarfod heddiw yn cael ei hailraglennu i'w thrafod ar ddyddiad i'w gadarnhau.
- Bod eitem 17 ar y Rhaglen Waith (Trawsnewid y Gwasanaeth Diwylliant) wedi ei hailraglennu i'w hystyried ar 28 Tachwedd, 2016.
- Bod eitem 20 ar y Rhaglen Waith (Achos Busnes Llawn ar gyfer Ysgol newydd ym Mro Rhosyr / Bro Aberffraw) wedi ei hailraglennu i'w hystyried ar 23 Ionawr, 2017.

Penderfynwyd cadarnhau Blaenraglen Waith ddiweddaredig y Pwyllgor Gwaith ar gyfer y cyfnod o fis Medi 2016 i fis Ebrill 2017 fel y'i cyflwynwyd.

6. ADRODDIAD BLYNYDDOL Y CYFARWYDDWR STATUDOL GWASANAETHAU CYMDEITHASOL

Cyflwynwyd adroddiad Blynyddol drafft y Cyfarwyddwr Statudol Gwasanaethau Cymdeithasol ar gyfer 2015/16 i'w ystyried gan y Pwyllgor Gwaith.

Dywedodd yr Aelod Portffolio ar gyfer Tai a Gwasanaethau Cymdeithasol mai hwn fyddai'r adroddiad blynyddol olaf ar ei ffurf gyfredol a'i fod yn darparu proffil o'r Gwasanaethau Cymdeithasol ac yn rhoi sylw i'r Gwasanaethau Oedolion a'r Gwasanaethau Plant am y cyfnod 2015/16, gan gynnwys perfformiad a chynnydd dros y flwyddyn o ran darparu gwasanaethau cymdeithasol. Mae'r adroddiad hefyd yn amlinellu'r ffocws ar gyfer gwella yn y flwyddyn sydd i ddod. Mae'r adroddiad wedi bod i'r Pwyllgor Sgriwtini a chaiff ei gyflwyno i'r Cyngor i'w gymeradwyo ym mis Medi. Dywedodd yr Aelod Portffolio fod yr adroddiad yn cynnwys nifer o bethau cadarnhaol yn cynnwys sylwadau canmoliaethus am y gwasanaethau a dderbyniwyd yn ogystal â rhai cwynion a fydd yn cael sylw gofalus. Mae sut y bydd y Gwasanaethau Cymdeithasol yn parhau i symud ymlaen yn elfen allweddol ac i'r perwyl hwn buddsoddwyd yn sylweddol yn y gwasanaethau a'r staff o ran recriwtio a hyfforddiant i'r gweithlu, yn enwedig mewn perthynas â'r gwasanaethau plant. Sefydlwyd Panel o Aelodau i ddeall effaith Deddf

Gwasanaethau Cymdeithasol a Llesiant (Cymru) 2014 ar draws yr ystod o wasanaethau. Mae'r Gwasanaethau Oedolion yn cael eu hailstrwythuro gyda golwg ar sicrhau bod gwasanaethau yn effeithiol o fewn cymunedau ac mae'r prosiect ar gyfer cynllun gofal ychwanegol yn Llangefni yn mynd rhagddo.

Adroddodd y Prif Weithredwr Cynorthwyol (Llywodraethu a Thrawsnewid Prosesau Busnes) a'r Cyfarwyddwr Gwasanaethau Cymdeithasol dynodedig fod yr adroddiad blynyddol yn adolygu effeithiolrwydd gwasanaethau cymdeithasol dros y flwyddyn wrth iddynt ymateb i heriau a'i fod yn diffinio'r amcanion ar gyfer y flwyddyn i ddod. Mae'r adroddiad yn edrych yn ôl ac yn pwysu a mesur pa mor dda y mae'r Gwasanaethau Cymdeithasol wedi ymateb i'r meysydd yr oedd AGGCC yn dweud bod angen iddynt wella yn ei Adroddiad Perfformiad Blynyddol ar gyfer 2014/15, yn ogystal â materion a nodwyd yn adroddiad blynyddol blaenorol y Cyngor. Un o'r meysydd a amlygwyd ar gyfer ei wella oedd y Gwasanaethau Plant, lle 'roedd y gwelliant yn fregus. O ganlyniad, blaenoriaethwyd y gwasanaethau plant ac fe sefydlwyd Rhaglen Wella ynghyd â Phanel Trawsbleidiol o Aelodau Etholedig i oruchwylio cynnydd yn erbyn y rhaglen wella tra hefyd yn gwella dealltwriaeth yr Aelodau o ofynion Deddf Gwasanaethau Cymdeithasol a Llesiant (Cymru) 2014. Buddsoddwyd yn sylweddol yn y Gwasanaethau Plant i sicrhau y cyflawnir y gwasanaethau statudol ac y cydymffurfir â gofynion statudol. Mae'r Gwasanaethau Oedolion wedi wynebu eu heriau eu hunain, yn enwedig pwysau yn sgil y galw yng nghyd-destun demograffi sy'n newid gyda chynnydd yn nifer y bobl hŷn; er bod nifer o fentrau newydd cyffrous yn cael eu datblygu, mae'n hanfodol cynnal momentwm a pharhau i ddiweddarau a moderneiddio. Rhan hanfodol o'r ymdrech hon yw parhad a datblygiad y trefniadau cydweithio a chydweithredu ar lefel gwasanaeth ac awdurdod lleol yn ogystal â chyda Bwrdd Iechyd Prifysgol Betsi Cadwaladr a phartneriaid eraill.

Adroddodd y Pennaeth Gwasanaeth (Gwasanaethau Oedolion) o safbwynt darparu gofal cymdeithasol i oedolion, gan gynnwys amrediad a natur y gwasanaethau a'r gefnogaeth a ddarperir, a soniodd am yr hyn a gyflawnwyd yn y flwyddyn flaenorol a'r heriau i'r dyfodol.

Dywedodd y Cynghorydd R. Meirion Jones, Cadeirydd y Pwyllgor Sgriwtini Corfforaethol fod y Pwyllgor Sgriwtini Corfforaethol yn croesawu'r adroddiad a'i fod, yn ei gyfarfod ar 11 Gorffennaf, 2016, wedi cynnig nifer o sylwadau ar ei gynnwys ac wedi gofyn i'r Cyfarwyddwr Statudol Gwasanaethau Cymdeithasol edrych eto ar y naratif i atgyfnerthu rhai elfennau o'r heriau y cyfeiriwyd atynt y llynedd a sut mae'r Gwasanaethau Cymdeithasol yn bwriadu ymdrin â hwy wrth symud ymlaen.

Penderfynwyd derbyn yr adroddiad a nodi Adroddiad Blynyddol drafft y Cyfarwyddwr Statudol Gwasanaethau Cymdeithasol ar gyfer 2015/16.

7. ASESIAD O'R FARCHNAD DAI LEOL

Cyflwynwyd, i'w ystyried gan y Pwyllgor Gwaith, adroddiad y Pennaeth Gwasanaethau Tai a oedd yn cynnwys Asesiad o Farchnad Dai Leol Ynys Môn am 2016.

Dywedodd yr Aelod Portffolio ar gyfer Tai a Gwasanaethau Cymdeithasol fod raid i bob awdurdod lleol lunio Asesiad o'r Farchnad Dai Leol i'w ddiweddarau bob dwy flynedd yn unol â gofynion Llywodraeth Cymru. Mae'r asesiad yn rhoi dadansoddiad manwl o'r amgylchedd tai lleol gan gynnwys asesiad o'r angen am dai ac mae'n helpu i lywio'r rhaglen datblygu tai sydd gan y Cyngor, gan gynnwys y tai fforddiadwy sydd eu hangen. Mae'n arbennig o bwysig hefyd yng nghyd-destun cynllunio ar gyfer adeiladu gorsaf niwclear arfaethedig Wylfa Newydd.

Ymhelaethodd y Rheolwr Strategaeth a Datblygu Tai ar brif ganfyddiadau'r Asesiad dan y pum thema a restrir yn adran 2 yr adroddiad a'r hyn y maent yn ei olygu ar gyfer yr adrannau polisi cynllunio a thai o ran darparu tystiolaeth i weithredu arni mewn perthynas â nodi blaenoriaethau tai a datblygu canllawiau cynllunio a rhaglenni tai fforddiadwy. Dywedodd y Swyddog bod yr asesiad, a wnaed gan HDH Planning and Development Cyf. ar y cyd ag AMEC ac Aecom a oedd hefyd wedi cynhyrchu asesiad 2013, yn cadarnhau bod nifer o'r tueddiadau a welwyd yn yr asesiad blaenorol yn parhau. Bydd y wybodaeth am yr angen am dai yn cael ei defnyddio i helpu i gynllunio rhaglen datblygu Tai y Cyngor.

Penderfynwyd cymeradwyo'r Asesiad o Farchnad Dai Lleol Ynys Môn i'w gyflwyno i Lywodraeth Cymru ac i'w ddefnyddio fel ffynhonnell sylweddol o dystiolaeth gwaelodlin ynghylch anghenion tai ar yr Ynys.

8. CYNLLUN RHEOLI CYRCHFAN NEWYDD AR GYFER YNYS MÔN AM Y CYFNOD 2016-2020

Cyflwynwyd, i'w ystyried gan y Pwyllgor Gwaith, adroddiad y Pennaeth Rheoleiddio a Datblygu Economaidd a oedd yn ymgorffori Cynllun Rheoli Cyrchfan newydd (CRhC) ar gyfer yr Ynys am y cyfnod 2016-2020.

Dyweddodd yr Aelod Portffolio ar gyfer Cynllunio a Datblygu Economaidd fod y dull Rheoli Cyrchfan yn galluogi'r sector cyhoeddus, busnesau twristiaeth a busnesau eraill yr Ynys, sefydliadau di-elw a'r gymuned i gydweithio i gyflawni amcanion cyffredin. Mae Llywodraeth Cymru / Croeso Cymru yn parhau i fabwysiadu'r egwyddor o gynllunio rheoli cyrchfan a sefydlu partneriaethau cyrchfan i gyflawni. Cefnogwyd hyn gydag adnoddau ariannol gan fod y sector yn hanfodol bwysig i ddatblygiad economaidd yng Nghymru. O ganlyniad i'r dull effeithiol o gydweithio lleol, ymgysylltiad ac ymdrech sylweddol y sector preifat a pholisi Llywodraeth Cymru, nid yw peidio ag adolygu a mabwysiadu Cynllun Rheoli Cyrchfan newydd yn opsiwn.

Dyweddodd yr Uwch Swyddog Datblygu (Twristiaeth a Marchnata) bod y cynllun wedi cael ei gyflwyno mewn partneriaeth â busnesau twristiaeth yn y sector preifat. Adolygwyd y cynllun cyfredol yng nghydestun adnoddau sy'n lleihau ar gyfer y Cyngor a chredir fod y cynllun newydd yn un realistig wrth symud ymlaen at 2020.

Dyweddodd yr Aelod Portffolio ar gyfer Tai a Gwasanaethau Cymdeithasol fod y bartneriaeth rhwng y Cyngor a'r sector preifat i'w chroesawu. Mae angen ystyried y dyfodol yn gadarnhaol ond gan gydnabod, ar yr un pryd, yr her o gefnogi'r sector twristiaeth drwy gydol y cyfnod o adeiladu Wylfa Newydd.

Penderfynwyd cymeradwyo Cynllun Rheoli Cyrchfan newydd ar gyfer yr Ynys am y cyfnod 2016 i 2020.

9 PROSIECTAU CYFALAF A GYLLIDIR GAN YR UNDEB EWROPEAIDD O 2014-2020

Cyflwynwyd i'w ystyried gan y Pwyllgor Gwaith, adroddiad y Pennaeth Rheoleiddio a Datblygu Economaidd ar y sefyllfa mewn perthynas â phrosiectau cyfalaf a ariennir gan yr UE o 2014-2020.

Dyweddodd yr Aelod Portffolio ar gyfer Cynllunio a Datblygu Economaidd bod canlyniad y refferendwm UE wedi creu amgylchedd o fwy o ansicrwydd ac nad yw natur, amseriad a chanlyniad trafodaethau i adael yr UE yn gwbl eglur. Mae'r tirlun gwleidyddol a chyllidol yn hollol wahanol erbyn hyn ac mae bron yn amhosib rhagweld beth fydd goblygiadau'r refferendwm oherwydd yr ansicrwydd hwn. Serch hynny, y negeseuon allweddol gan Lywodraeth Cymru mewn perthynas â chronfeydd strwythurol yr UE yw eu bod yn parhau i fod ar agor ar gyfer busnes; yn parhau i ganolbwyntio ar gynnal y rhaglenni cyfredol; yn parhau i gymeradwyo prosiectau ac annog noddwyr prosiectau posib i barhau i ddatblygu prosiectau. O ganlyniad, mae'r argymhellion a wnaed cyn y refferendwm fel yr amlinellir nhw yn yr adroddiad yn parhau i fod yn ddilys a gofynnwyd i'r Pwyllgor Gwaith eu cymeradwyo.

Dyweddodd y Rheolwr Datblygu Economaidd fod yr hinsawdd ariannol ar gyfer llywodraeth leol yn heriol sy'n golygu bod cyllid allanol yn fwyfwy pwysig er mwyn cyflawni amcanion corfforaethol. Mae'r Gwasanaeth Datblygu Economaidd a Rheoleiddio wedi bod yn gweithio'n galed ar ddatblygu prosiectau dros y 18 mis diwethaf, gan ddatblygu cynigion ar gyfer prosiectau a chynlluniau busnes cadarn i sicrhau cefnogaeth cyllid allanol er mwyn hyrwyddo datblygiad economaidd a helpu i greu cymunedau ffyniannus. Mae'r adroddiad diweddar yn Atodiad A yn adolygu'r dirwedd bresennol o ran prosiectau cyfalaf a gyllidir gan yr UE yn y cyfnod 2014-2020 yn ogystal â darparu diweddariad ar ddatblygiad prosiectau.

Dyweddod yr Aelod Portffolio ar gyfer Tai a Gwasanaethau Cymdeithasol bod angen i'r awdurdod fanteisio i'r eithaf ar gyfleoedd ariannu gan yr UE tra'u bod yn dal i fod ar gael.

Dyweddod yr Aelod Portffolio ar gyfer Cyllid, er bod pryderon ynghylch cael cyllid gan yr UE ar gyfer prosiectau o ganlyniad i adael yr UE, mae Llywodraeth Cymru wedi gofyn am sicrwydd gan Lywodraeth y DU na fydd Cymru ar ei cholled yn ariannol ac y bydd setliad uwch i Lywodraeth Cymru o dan fformiwlâ Barnett i ddigolledu am gollir arian a gafwyd yn flaenorol gan yr UE. Fel ardal sy'n derbyn arian gan yr UE, mae'n bwysig nad yw Ynys Môn dan anfantais o ganlyniad ac mae achos dros ofyn i Gymdeithas Llywodraeth Leol Cymru edrych ar y fformiwlâ ar gyfer dyrannu arian i'r rhanbarthau.

Penderfynwyd: -

- **Bod y Pwyllgor Gwaith yn cefnogi'r gwaith o ddatblygu a chyflawni'r portffolio o brosiectau cyfalaf sy'n targedu Cyllid Ewropeaidd.**
- **Bod yr awdurdod i dderbyn cynigion o gyllid grant gan Lywodraeth Cymru a ffynonellau eraill ar gyfer y prosiectau a amlinellir yn Nhabl 1 Atodiad A yn cael ei ddirprwyo i'r Pennaeth Gwasanaeth (Rheoleiddio a Datblygu Economaidd) mewn ymgynghoriad â'r Swyddog Adran 151.**
- **Cefnogi cynnwys yr is-brosiectau Cyrchfannau Denu Twristiaeth ac Adeiladu ar gyfer y Dyfodol gan yr UE yn rhaglen gyfalaf 2016-2020 y Cyngor, a chymeradwyo cyfraniad o £80k fel cyllid cyfatebol i ariannu prosiect Porth Ymwelwyr Ynys Gybi.**
- **Bod y Pennaeth Gwasanaeth (Rheoleiddio a Datblygu Economaidd) mewn ymgynghoriad â'r Swyddog Adran 151 yn sefydlu trefniadau llywodraethu cyflawniad prosiectau er mwyn paratoi at pan gaiff cyllid ei gymeradwyo.**
- **Cefnogi rôl y Cyngor Sir yn gweithredu fel cyfryngwr ar gyfer Menter Môn ac Ymddiriedolaeth Treftadaeth Porthaethwy i sicrhau cyllid allanol i wella Pier y Tywysog ac ar gyfer y Gymdeithas Frenhinol er Gwarchod Adar mewn perthynas â'r ganolfan ymwelwyr yn Ynys Lawd.**
- **Gofyn i'r Grŵp Asedau Corfforaethol adolygu'r holl opsiynau ar gyfer ailddatblygu adeilad Neuadd y Sir.**

10 TROSLWYDDO PARC CAERGYBI FEL ASED CYMUNEDOL

Cyflwynwyd, i'w ystyried gan y Pwyllgor Gwaith, adroddiad y Pennaeth Rheoleiddio a Datblygu Economaidd mewn perthynas â'r cynnig i drosglwyddo Parc Caergybi i Gyngor Tref Caergybi

Crynhodd yr Aelod Portffolio ar gyfer Cynllunio a Datblygu Economaidd gefndir y cais a chrybwyllodd y rhesymau dros y cynnig i drosglwyddo Parc Caergybi i Gyngor Tref Caergybi, a'r broses a ddilynwyd fel yr amlinellwyd yn yr adroddiad.

Dyweddod y Rheolwr Hamdden Masnachol fod yr eiddo wedi bod ym mherchnogaeth y Cyngor ers 1917 pan gafodd ei roi yn rhodd i Gyngor Dosbarth Trefol Caergybi (a olynwyd gan Gyngor Sir Ynys Môn) o dan delerau Deddf Tir Adloniant 1859. Y cyngor cyfreithiol yw bod y parc yn cael ei ddal mewn ymddiriedolaeth; mae'r eiddo wedi ei brisio'n annibynnol gan y Prisiwr Dosbarth, ond fel ymddiriedolaeth, rhaid cadw unrhyw incwm yn sgil gwerthu / trosglwyddo'r eiddo hwn i bwrcas cyflawni amcanion yr ymddiriedolaeth ac felly byddai'n cael ei drosglwyddo gyda'r ased. Cyfeiriodd y Swyddog at y mynegiadau o ddiddordeb a gafwyd a'r rhesymau pam yr oedd Cyngor Tref Caergybi wedi sgorio'n uwch na'r sefydliad arall.

Penderfynwyd cymeradwyo trosglwyddo Parc Caergybi i Gyngor Tref Caergybi yn rhad ac am ddim am y rhesymau a nodir yn yr adroddiad ysgrifenedig.

**Y Cynghorydd J. Arwel Roberts
Cadeirydd**

DRAFT